

## 59.—HE TANGI MO TE KORE.

Na PARETEKAWA. (Ngati-Maniapoto.)

*Na Te Taite Te Tomo whakamarama.*

Ko Te Kore he wahine rangatira no Ngati-Maniapoto, ko te whaea o Manga, ara, o Rewi Maniapoto; i mate i a Waikato ki Paterangi, e tata ana ki Kihikihi. Ko Paretekawa he wahine rangatira hoki no Ngati-Maniapoto, i takea ai te ingoa o tera hapu o Ngati-Paretekawa, he hapu rangatira no Ngati-Maniapoto.

Ko 'Nga Moteatea' (M. 24) e ki ana na Rarawa-i-te-rangi tenei tangi mo Te Kore, i te kitenga ai i tona upoko e iri ana i runga i te turuturu. No te hapu kotahi a Paretekawa raua ko Rarawa-i-te-rangi.

(Ref: M. 24.)

Kaore te whakama ki au ra,  
E taka kau noa nei;  
He po kia moea, he ao ka tirohia.  
Te takiringa mai o te ata i nga pae,  
Kia tohu ake au ko nga mahinga<sup>1</sup>  
Kihai hoki mai.  
He oti te tangata i kore mahara ki roto;  
Te muri aroha ki to tau tumau.  
Tenei ano ra o maru i waiho,  
Te mau nei, e, kei taku tuakiri.  
Ko aku mata i rehu.  
E whakawhetu mai ana roto.  
Ma te aha e kawe  
Te tawhatitanga kei te Hahanga,<sup>2</sup>  
Kia komihi au e Kore!<sup>3</sup> ki a koe;  
Nau ia waiho te kiri awHINGA nei.

---

<sup>1</sup>Nga mahinga.—Nga whawhaitanga.

<sup>2</sup>Te Hahanga.—He tawhatitanga e tata ana ki Paterangi.

<sup>3</sup>E Kore.—Ko Te Kore.

## 60.—HE TANGI MO TE HEUHEU I HOROA E TE WHENUA.

(Ngati-Tuwharetoa.)

*Na Te Taite Te Tomo i whakamarama.*

Ko tetahi tenei o nga waiata nunui a Ngati-Tuwharetoa. E tika ana hoki kia wehi te tangi mo te aitua, i mate ai te taniwha o Taupo, a Te Heuheu, ratau ko tona iwi i te horo iho o tetahi taha o te maunga o Kakaramea, i Taupo, i te po o te 4 o nga ra o Mei, 1846. E kiiia ana ko te take o te horo, he hu no tetahi wahi paruparu (mud volcano) i te taha marangai o Kakaramea.